

Annáll Lindu Leu Bogadóttur, markaðs- og menningarfulltrúa Fjallabyggðar, við afhendingu menningarstyrkja og útnefningu Bæjarlistamanns Fjallabyggðar árið 2022.

Kæru gestir gleðilega hátíð.

Ég býð ykkur öll hjartanlega velkomin.

Í kvöld ætlum við að útnefna Bæjarlistamann Fjallabyggðar árið 2022 í 13. sinn. Í ár, líkt og fyrir ári síðan, notum við tækifærið og afhendum formlega styrki til menningarmála og til hátíðarhalda. Við munum ekki afhenta formlega rekstrarstyrki til safna og setra eins og við höfum ávallt gert á þessari hátíð en vissulega voru veittir styrkir í þeim flokki í ár, einnig voru veittir styrkir til fræðslumála og ýmissa málefna. Fjallabyggð veitir einnig styrki til hátíðarhalda í formi afnota á húsnæði og munum Fjallabyggðar ásamt fasteignaskattsstyrki.

Ekki þarf að fara í grafgötur um það hversu mikilvæg menningin er fyrir land og þjóð, og hún er ekki síst mikilvæg fyrir okkur þegar að kreppir, hvort sem er í fjármálakreppu eða nú þegar faraldur geisar. Faraldurinn hefur haft mikil áhrif á menningarstofnanir og starfsemi þeirra á landsvísu og einnig í okkar samfélagi. Hvort sem um er að ræða einkaaðila, söfn, setur eða áhugafélög.

En hvers virði er menningin ?

Framlög Fjallabyggðar til menningar hafa ekki hækkað síðustu tvö ár og hefur Markaðs og menningarnefnd Fjallabyggðar 2.7 milljónir kr. til að dreifa á þær umsóknir sem berast í flokknum menningartengd verkefni. Í kvöld eru það 14 verkefni sem deila með sér þeirri upphæð og er það sambærilegur fjöldi verkefna og síðasta ár. Umsóknarupphæðir þessara verkefna voru upp á tæpar sex milljónir. Styrkumsóknir til hátíðarhalda voru átta og heildarupphæð umsókna ríflega 6 milljónir og einungis rétt ríflega 3 milljónir í þeim potti. Fimm verkefni hlutu peningastyrk og þrjú styrk í formi afnota af munum og húsnæði Fjallabyggðar og vinnuframlagi starfsmanna.

Flest okkar vitum að menning skapar verðmæti fyrir samfélagið og eykur lífsgæði þeirra sem í samfélaginu búa, hún er mikilvæg næring fyrir líkama og sál og á það veður ekki settur verðmiði.

Öflugt menningarlíf styður jákvæða samfélagsþróun og að auki ánægju íbúa með sinn stað og gerir samfélagið áhugaverðara fyrir gesti og til búsetu. Menning er burðargrein í upplifunarahagkerfinu og æ fleiri velja sér ýmis skapandi störf sem atvinnu og leggja stund á nám í skapandi greinum, ekki síður en í ferðaþjónustunni sem dæmi. Samfélag þar sem slík störf er ekki að finna er því fábreyttara, ekki einungis félagslega heldur einnig efnahagslega.

Vissuð þið að árið 1997 vann Stefán Ólafsson, félagsfræðingur, rannsóknina „Búseta á Íslandi“ og varpaði með henni, ef til vill fyrstur manna, skýru ljósi á, að fjölbreytt framboð afþreyingar og menningar getur skipt sköpum þegar kemur að ákvörðun

einstaklingsins um búsetu, ekki síður en aðrar atvinnugreinar svo sem atvinnumöguleikar, aðgengi að menntun, heilbrigðisþjónustu, dagvistun og fleira. Rannsóknin gefur til kynna að raunverulegur áhrifaþáttur í samfélögum sé öflugt og fjölbreytt menningarstarf og það að geta tekið þátt í menningarstarfi og sótt menningarviðburði.

Þrátt fyrir allt og takmarkað (minna) fjármagn, þá er lista og menningarlífið í Fjallabyggð öflugt og fjölbreytt, jafnvel í miðjum heimsfaraldri. Þau ykkar sem starfið í þessum geira eruð stöðugt að finna stað og stund til að gleðja, fræða og efla okkur hin með vinnu ykkar og eljusemi. Þið þessi sterki hópur skapandi fólks vinnið svo sannarlega metnaðarfullt og óeigingjarnt starf sem veitir einstaklingum samfélagsins og gestum þess fjölbreytni í afþreyingu og um leið bættari lífsskilyrði. Ykkur tókst það þrátt fyrir allt - að krydda líf okkar bæjarbúa og gesta með litríkri menningu, með tónlist, myndlist, leiklist, sýningum, áhugaverðum erindum, hátíðarhöldum og fleiru. Söfn og setur voru opin og viðburðir haldnir.

Ef maður horfir yfir nýliðið ár og skoðar viðburðadagatöl og fréttir má sjá að árið 2021 var fjölbreytt í menningarlegu tilliti þó vissulega hafi nokkur verkefni sem hlotið höfðu styrk á árinu 2021 verið lögð niður eða þeim frestað vegna ástandsins. Vonum við að þau komi samt aftur inn seinna.

Við verðum að halda áfram að finna leiðir og leggja metnað okkar í það verkefni að fjármagna menninguna í okkar samfélagi. Samfélagið gerir kröfu um að hún sé til staðar, því við þurfum á henni að halda, af því hún er mikilvæg næring fyrir líkama og sál og af því að hún eykur lífsgæði þeirra sem í samfélaginu búa. Við þurfum á því að halda að hér séu starfandi listamenn og frumkvöðlar, að söfnin okkar séu opin íbúum án aðgangseyrirs. Við þurfum á því að halda að einhver varðveiti menningararfi okkar og sögu. Að uppbygging og vöxtur eigi sér stað og að hlúð verði að þessari atvinnugrein hún er hluti hagkerfinu og skilar tekjum til samfélagsins.

Við hljótum að vilja vera samfélag þar sem hugarfar, fjármagn, markaðsaðgengi, umgjörð og mannauður styðja við nýsköpun sem grundvöll menningarlegra og efnahagslegra lífsgæða? Viljum hljótum að vilja vera samfélag þar sem virðing er borin fyrir frumkvöðlum og skapandi einstaklingum og umfram allt vera fyrirmynd annarra sveitarfélaga.

Ég vil þakka þeim fjölmörgu aðilum sem hér starfa að list, menningu og nýsköpun í geiranum, þakka þeim fyrir þeirra gríðarlega góða og vel unna starf og þeirra framlag til eflingar menningar í bæjarfélaginu.

Þakka ykkur fyrir mig.